

Кому Республикаса том войтырлөн газет



2014
лөддза-
номъя
27-өд
лун

25 №
(1150)



**«Пеледыш пайрем» -
дзоридза гаж**

8-9 л.б.

**Тайо
НОМЕРЫН**

Июнь 19-21-öd лунъясö Йошкар-Ола карын мунис финн-йöгра журналистъяслöн став Россияса VI-öd форум, кытчö чукöртчывлсны Марий Элысь, Башкортостанысь, Карелияысь, Мордовияысь, Комиысь, Удмуртияысь, Ненеч да Ханты-Манси автономнöй кытшг-ясысь, Москваысь да Казанысь матö 70 журналист.

4
л.б.

Финн-йöгра войтырлөн эм аслас национальной гаж, кор öтувтöны региона став вуж-войтырыс: и посни, и верстьö. Сэки кылан-аддзан-казялан йöзлысь аслыспöлöслунсö, быттьö ачыд суныштчылан налөн олöмö. Финн-йöгра журналистъяслы мойвиис ас син-мөн адзвывны «Пеледыш пайрем» («Дзоридзяслөн гаж») национальной праздник.

8-9
л.б.

Йошкар-Олаö форум выlö воысь финн-йöгра журналистъяслы нöшта мойвиис тöдмасыны карыслөн аслыспöлöс архитектурайн, видзöдлыны уна сикас памятник выlö, мунны Патриаршей площадь вывти, сэтчöс уличаяс кузя. Карыс зев ёна вежсьöма бöрзя воясö, быттьö кутшöмкö европейскöй карён лöбма.

12-13
л.б.

Жар гожöмнад горш кось-мöмысь отсалас чöскыд лимонад да сок. Дасытны найöс абу сьöкыд. Татшöм юантортö торйөн нин радейтöны челядь.

16
л.б.

Семья, радейтчöм да верность став Россияса лун пасйöны Россияса быд карын. Сыктывкар тайо традицияысь оз жö öтдортчы: быд во июль 8 лунö котыртлöны ыджыд гаж юркарсалы да карса гöсьтъяслы.



Катшасина гаж

Таво гажыс бара на лö юркарса Степан изэрд вылын. Сэки котыртласны посни челядьлысь котöртöм, а верстьöджык челядь ордйыясны самокатөн да велосипедөн ветлöмын. Медся тэрыбъяслы лöоны козинъяс.



Гаж выlö воысьяс вермасны пырöдчыны семьяпытшса ворсöмö, конкурсö, гажыслөн символ (катшасин) вöчан мастер-классö, йöктыны флеш-мобын да нимкодясьны концертөн. А нöшта позяс номсасыны катшасин мыгöра печенньөн. А медбöрын медся бур гозъяыслы сетасны «За любовь и верность» медаль.

Корам ставнысö кыпыда пасйыны тайо семьяпытшса гажсö. Локтöй став семьяён! Гажыс мунас июль 8 лунö Сыктывкарса Стефановскöй площадь вылын.

Социальной технологияс сöвмöдан региона шöринлөн юöр серти



КОЛАНА УДЖ

Юркарса госавтоинспекциялөн том отсасысьяс, Сыктывкарса 30-өд номера школаын велөдчысьяс, петалисны рейдö инспекторьяскöд Эжваса уличаясö. Медшöр могыс налөн вöли - нöшта öтчыд уськöдны тöд вылö, кыдзи колö ветлыны туй вывти велосипедөн.

Кужöмөн ветлы «кык гöгыля ёртыдкöд»!

Öнiя кадö велосипедөн журъялöны вель унаöн: кодкö дзоньвидзалунсö ёнмöдö, кодкö удж вылö ветлö, а кодкö и прöст кадсö татшöм ногөн коллалö. Торйөн нин вель уна челядь ветлöны «кык гöгыля ёртясөн». А тöдöны-ö найö туйывса индöдъяс? Буретш та могыс том инспекторьяс разöдалисны велосипеда войтырлы правилöяса буклет-кабалаяс.

Ичöт морт видзöдö пыр верстыö вылö: сийö кö торкалö туйывса индöдъяс - дзюлюкыд тшöтш сы ногөн кутас ветлыны. Том инспекторьяс тшöтш и верстыöлы нöшта öтчыд казтыштисны, медым и найö велöдисны посниловöс.

Рöмдан да пемыд кадö велосипедөн ветлысьлы колö быть пысавны сiдз шусяна светоотражательяс - машина би улын югъялысь пасьяс. Сiдзжö пемыд кадö колö зильны пасьтавны югыд рöма паськöм: еджыдöс либö синмö шыбитчана мöд рöмаöс. Тайö ставыс колö, мед машинаөн рулитысь ылысянь адзис велосипеда мортöс.

Ныв-зонлы кажитчис öтув уджавны ГИБДД-

са инспекторьяскöд. Ставөн öтув найö сиисны ветлысь-мунысьлы видзчысьны туй вылын.

ГИБДД-са инспекторьяс тöдчöдöны: баты-мам да верстыöджык томулöв, энö кольбöй велосипеда дзюлюкьясöс öтнанисö ыджыд туй вылын!

Юркарса ГИБДД-лөн юöр серти



АДДЗЫСЬЛӨМ

Июнь 19-21-öd лунъясьö Йошкар-Ола карын мунис финн-йöгра журналистъяслөн став Россияса VI-öd форум, кытчö чукöрмывлісны Марий Элысь, Башкортостанысь, Карелияысь, Мордовияысь, Комиысь, Удмуртияысь, Ненеч да Ханты-Манси автономной кытшъясысь, Москваысь да Казаньысь матö 70 журналист. Комиысь Йошкар-Олаö ветлісны «Коми йöзöдчан керкаысь» сизим журналист.

И водзö кутам нимöдны!

Форум котыртысысь - Россияса финн-йöгра журналистъяслөн ассоциация (РАФУЖ). Медводза фестивальыс вöлі буретш РАФУЖ котыртчан воö - 2003 воö - Йошкар-Олаын, мöд вонас бара на аддзысьлісны финн-йöгра журналистъяслөн Марий Элын. Кой-мöд фестивальыс вöлі 2007 воö Сыктывкарын, нельöдыс - 2008 воö Ижевскын, да витöдыс - 2010 воö Саранскын.

Тавося квайтöд аддзысьлөмсö восьтіс РАФУЖ-лөн президент Александр Саликович Абдулов, коді тшöтш веськөдлö «Марий Эл» газетөн. Сійö висьтасис финн-йöгра журналистъяслөн удж да төжд-мог йылысь. Медшөр майшасьомыс, дерт, сьомö крукасьö. Торйөн нин мукöд регионса журналистъяслөн удждон серти. Вөлөмкö, миян - коми журналистъяслөн - да башкирияса уджёртъяслөн медся ичöт: регионын кык пöв этша шöр удждонысь! Мукöдлаас тайö лыдпасыс пöшти öткодясьö шöр удждонкöд, а Чувашияын весиг төдчымөнъя унджык на.

Форум вылö воліс тшöтш и Москваысь телевидение, радио да печать евразияса академияысь вице-президент Кипрас Мажейка. Нималана журналист-международник висьталіс, мый сідз шусяна цензура медводз пö мед



вöлі журналистлөн юрас, сöмын сэки артмас лыддяна гижöд.

«Гöгрöс пызан» дырйи нин финн-йöгра журналистъяслөн юкисны асланыс уджөн, выльпыртöмъясьон, сетісны колана вöзйöмъяс, кыдзи кутны тираж да ышöдны лыддысьсысьсöс судзöдны газет-журнал. Пöшти быд регионын ёна содöма пошта пыр гижöдчöм - буретш та серти уна сёрни кыптыліс: ёна пö чинас лыддысьсысьлөн лыдыс, торйөн нин ылі сикт-грездъясын ичöт

удждон босьтысь войтыр пöвстын.

Форум помын бöрйисны РАФУЖ-лысь выль президентöс: Александр Абдулов веськөдлан «вöжжисö» сетіс Мордовияын «Чилисема» челядлөн журналысь главной редактор Николай Иванович Ишуткинлы. Николай Иванович төдчöдіс, мый дыр мөвпалöма веськөдлыны босьтчөм кузя, да сöмын сэк окотитöма, кор Мордовияса чина йöз кöсйысьсöмаöсь водзö отсавны сьомён РАФУЖ-лөн водзмöстчөмлы.

Кутам лача, мый и водзö аддзысьлөмъяс лöһны татшöм жö кыпыдöсь да бурöсь, медым ми - газет дасьтысыяс - вермим венны öтувъя төжд-мог да водзö нимöдны чужан кывъя петасъяс.

А гортö мунан лунö - июнь 21-öd лунö - формувывса госьтысылы уси шуд веськавлыны «Пелёдыш пайрем» («Дзоридзьяслөн гаж») мари праздник вылö. Та йылысь паськыдджыка гижам «Йöлöгалон» 8-9-öd лист бокъясын.

Галина МАКАРОВА.



ВОДЗМӨСТЧӨМ

Неважён помасис том журналистъяс пөвстын «Уголок моей Родины» конкурс, кодс нуөдс Комиын журналистъяслөн котыр. Конкурсыс мунис «Мультимедийная журналистика для школьников Республики Коми» уджтас подулын.

Коми Республикаса журналистъяслөн котыр нуөдаліс том гижысьяслы некымын велөдан семинар. Районса ныв-зон окотыпырысь босьтисны төдөмлун да кывзисны журналистъясөс мастер-классъяс вылын. Том журналистъяс сюркнялісны пель саяныс верстьөджык да уна опыта нин уджъяртъяслысь висьталөм-велөдөмсө, кывзисны газет-журнал тэчөм-вөчөм йылысь. Ставнас велөдан семинаръясө пырөдчылісны вит районьыс матө 300 томулов.

Проектын жө тшөтш вөлі урчитөма творческой конкурс нуөдөм. Татчө пырөдчыны вермис республикаса быд кар-районьыс окотитысь. Конкурсыслөн медшөр могыс - унджык төдмавны аслад чужанін, обряд да традиция йылысь, а тшөтш и мичаа да интереснөя гижны сы йылысь.

Ставнас жюрилөн донъялөм вылө воис Изьва, Көрткерөс, Луздор, Кулөмдін, Сыктыв, Емдін районъясысь, Сыктывкарысь да Ухтаысь матө ветымын удж.

Конкурс вылө воём уджъяс юкисны некымын нимпас серти: «Традицияс, обычайяс да обрядъяс», «История да культура памятникъяс», «Чужанінлөн мичлун», «Национальной культуры ралөн торъялөм» да «Туристъяслөн ордым». Быд номинацияын бөрийсны вермысьөс. Медводдза местаяс вичмисны Ухтаысь Светлана Цимбалюкы, Изьва районса Сизяб сиктысь Оксана Чупровалы да Анастасия Каневалы, Луздор районса Ношульысь Светлана Пономарёвалы да Изьваысь Фаина Истоминалы, коді öні велөдчө юркарса физико-математической лицейын. Ставнас 1, 2 да 3 местаяс дипломъяс босьтис 24 морт, мукöдыс - конкурсө пырөдчөмысь диплом. Таясь өтдор, дас вит вермысьясы усьи шуд ветлыны шойчыны «Орлёнок» лагерө. И нөшта дас вит мортлы журналистъяслөн котырсянь вичмасны вузö пыригөн сідз шусяна рекомендацияс.

Валентина ЛЯХ,
проект гасьтысь

Вермисны ТОМ журналистъяс



Редакциясянь:

Ми окотыпырысь кутам йөзөдны конкурсө пырөдчысьяслысь коми кывъя уджъяс. Тайö петасын йөзөдам нин кум удж. Лыдгөй да нимкодясьöй томуловлөн сьөлөмяныс гижөм сочинениеясон.



ЧУЖАН МУ

Лебежнõй грезд пырõ Парчса сиктсõвет улõ. Быдсяма чуй-мõдана висътсõ позьõ кыvelyны олõма йõзсянь Лебежнõй да Парч йылысь. Тувсов каникул дырйи пункті аслым мог - быть волены Лебежнõйõ да тõдмаvны шемõсмõданаторъяс татчõс местаяс йылысь. Медводз шуи шыасьны нималана кыйсьысь вокъяс дорõ. Мыйла буретш кыйсьысьяс дорõ? Да сы вõсна, мый кужõмлун-тõдõмлунсõ найõ вуджõдлõмаõсь кõленаысь кõленаõ.

Лебежнõйса тыяс

Вокъясõс сиктын тõдõны кызд Ким Славик да Ким Валерий. Менõ сюся кывзõм бõрын найõ шуисны, мый таво пõ тәнõ, муса нылук, тõдмõдам Лебежнõй гõгõрын нюжõдчõм нэмõвõйся гырысь тыясõн. А кажитчас кõ пõ тәныд, мõд во нõшта на мый йылысь кõ висътыштам. Сьолõм чеччаліс радõйла, мед сõмын, мися, оз õдйõ висътасьны-а. От кõ кут удитны пасъяvны - юр яндзим лõ!

И со мый ме тõдмалі: Лебежнõй сикт, лэччыны кõ Парчсянь, сулалõ Эжвалõн веськыд берег вылас. Сиктлõн мõдар берег вылас шевкнитчõмаõсь сизим ыджыд ты: Лебежнõй ты - ёна важõн татõн век вõлõм пукалõны мичасъыс-мича юсьяс; Трõкõзер - куим ты пõ йитчõмаõсь õтиõ, Кõина ты - коркõ важõн кыйсьысьяс виõмаõсь энъ кõинõс, сэксянь пõ ай кõиныс абу этша вотчысьõс да кыйсьысьõс косявлõма; Ыдждыд ты - быдсяма чериыс пõ эм тані; Трõста - кутшõмкõ локтысь морт пõ медводз аддзõма тайõ тысõ, пыскыльтыштõ вõлõм неуна да «трõста» кыв местаяд вõлõм шуалõ «трõста», Гõрнõй - зэв векныд, но атгõ джудждыд

ты, дай шуштõм места, тысяньыс берег вылас он вермы весиг кайнысõ, Кõрсюра - мегыр кодъ чу-кля ты, кõръяс рõдмывлõмаõсь берег пõлõныс (водзын тай йõгра йõз овлõмаõсь миянланьын, найõ и нимтывлõмаõсь. Сизимнан тыис йитчõмаõсь õтамõдныскõд векныдыд висътясõн. Но оз сõмын тайõ матыст тыяссõ.

Лебежнõй сиктса олысьяс серти, сикт гõгõрын тыясас ваыс - олõмыслõн панас, аслыспõлõс подув. Тайõ тыясас ваыс нуõ висътõмъяс, лёктор. Тõдъсьяс дорõ вõлі шыõдчõны йõз, медым мõдõдны лёксõ ва паныд. Тыясын ваыс - кулõмаяслõн мõдаръягыдõ вуджан туй.

Сиктсалõн кõ помтõг висътліс юрыс, мõдõдлісны кодõскõ рõдвужсьыс матысса тыõ вала, медым висътысьыс корис прõща, ваыс пõ скõралõ да, сійõн и висътõ юрыд. И колõ пõ вõлі васõ быть вайны асья кыаõдз.

Лебежнõйса верстьõ йõзыд тшõкыда босътывлõмаõсь аскõдныс ичõt челядьбõс, мед пõ тõдõны да пыдди пунктõны батъяслысь вõр-ваыскõд йитчõмсõ.





Медводдзаысь ты вылө петигөн челядьлы тшөктывлöмаось шыбитны ваас чагтор, медым ваис видзис, а эз вöч лёктор. Ковмылис кö кывтны ты кузя, шыбитлöмаось ваö нянтор да сьом, быть мыськывлöмаось чужöм, ки да корлöмаось бурсийом. Кымын унджык ты пö оломад вуджан, сымын унджык грекысь мынтöдчан. Эскылöмаось: татшöм морт лоö тöдысь кодь да бурдöдан вынаöн.

Тшöкыда Лебежнöйын олысьяс быд тулыс вайывлöмаось тыяслы козинъяс. Чери кыйысьяс медводдза кыйöм черисö лэдзлöмаось ваас. Ва дорö воигөн сетлöмаось Васалы нянь-сов.

Зэв чуймöданаторийöн лооны тусяпуяс, кодъяс быдмöны сизимнан ты пöлöныс. Лебежнöйса тöдöны, тусяпу - тайö налөн вежа пу, вогöгöрся оломлөн пас. Быдсяма вомидзысь, керöм-тшыкöдöмысь, шуöны, видзö тусяпуыд. Та вöсна быд кыйсьысь да вотчысь вайлöмаось гортас тыяс бокысь тусяпутö да суйлöмаось öдзöс весьтö, кага потанö, кöлысь бöрын том гозъялы юрлöс улас, весиг скöt видзанинö.

Чери кыйысьяс кор волісны ты бокö, мунлісны тусяпу тшына бипур пыр. Асьнысö сöстöммöдöм могысь бипурö шыбитлісны некымын тусяпу чаль, öткымынъяс вöчлісны тадзи быд кулом ваö шыбитöм водзын.

Ыджыд кослунъялөн бөръя вежонö Великöй Четвергö тусяпуөн тшынöдлісны став пыжсö, кодъясöн петавлісны тыяс вылө кыйсьыны. Шыöдчывлöмаось вöрса да васа Енъяс дорö, медым видзасны найöс.

Чери кыйысьяслөн вöлöма быд ты дорö аслас нимкыв. Шöпкöдыштан кö пö - шедас, кутшöм чери колö. Но водзвыв висътавны, кутшöм тыö мунан, некод эз лысьтлы. Водзвыв быгзыны Лебежнöйса йöзыд и öнi на оз кужны. Та вылө, дерт, эм помка. Полöмаось вомдзалöмысь.

Прамöй чери кыйысьлөн быть эм кутшöмкö ты дорын вөр керка. Оломаджыкъяс гожöмбыд овлöмаось вөр керкаын - дасътöмаось ветельяс да кыйсьöмаось. Ставныс тöдлісны сідз шусяна «гижтöм законъяс» йылысь, эз торкавны найöс.

Ме вості аслым Лебежнöй сикт гөгöрын паныдасьлысь тыяс йылысь сы мында вьлитор, мый уна лун да вой на шензи. Олом чöж кута помнитны та йылысь.

*Татьяна ПОПОВА,
Кулöмгін районысь
Р.Г.Карманов нима Немгінса школа
8-öд класс помалысь.*

*Велöдысь:
Елена Фёдоровна НЕСТЕРОВА.*



Рөдвуж
ОРДЫН

Финн-йöгра войтырлөн эм аслас национальнöй гаж, кор öтувт-чöны регионса став вужвойтырыс: и песни, и верстьö. Сэки кылан-аддзан-казялан йöзлысь аслыспöлöслунсö, бытьö ачыд суныштчылан налөн олөмö.

«Пеледыш пайрем» - дзоридза гаж

Финн-йöгра журналистъяслы, кодъяс воддза вежонö чукöртчылысны Йошкар-Олаын форум вылö, мойвиис ас синмөн аддзывны «Пеледыш пайрем» («Дзоридзьяслөн гаж») национальнöй праздник.

Водз асывсаян йöзсыс чукöртчисны Йошкар-Оласа В. Ленин нима культура керка водзын. Бытьö уна дзоридза видз вылö веськалим - быд делегациялөн, быд землячестволөн паськөмныс синмад шыбитчис аслас мичлуннас. Вочасөн йöзлөн лыдыс лои лыдтöм-тшöттöм. Кузьсыс-кузь колоннаö чукöртчөм бöрын, быд котырлөн аслас гижöд-пас, мөдöдчим карыслөн шөр улича кузя сыйлөмөн-йöктөмөн культура да шойччан медшөр парклян. Сэни нин ставнысö чолөмалисны Марий Эл республикаөн Юралысь Леонид Маркелов да мукöд чина войтыр.

«Пеледыш пайрем» чукöртис Марий Элын олысь, а сіджö мари войтырöс, кодъяс олөны Башкортостанын, Татарстанын, Удмуртияын, Кировын, Улыс Новгород, Свердловск обласьтыясын, Пермь крайын.

«Пеледыш пайрем» йитчöма тувсовъя гөра-көдза удж помаськөд, та понда тайö луно чолөмалöны видз-му овмöсын уджалысьясöс. Традиция серти, нöшта котыртöны «Агавайрем» обряд гаж, «Кудо» подворьяслөн мастерлун петкөдлан да «Шокто, гармонь» («Играй, гармонь») конкурсыяс, помтöг сыйлөны частушкаяс. Таво медводдзаысь нуöдисны «Мелна пайрем» («Праздник блинов») гаж. 30 сикас блин позис видлыны! А чöскыдöсь да! Гажсö кывкөртöдалис этнодиско-тека, кытөн петкөдчисны мари эстрадаса кодзувьяс. Ворсисны, сыйлисны, йöктисны, вын-сымөн ошйысисны, ассыныс культу-расö нимöдисны. А ми нö эськө, коми войтыр, кужам ог тадзсö öтув, ставнас республикаөн, гажöдчыны?

Екатерина МИКУШЕВА





Историяысь

Мари войтыр важысянь нин лыддисны дзоридзьястё тӧдчанаторйӧн, йитисны гӧгӧрвотӧм (таинственнӧй) олӧмкӧд. Дзоридзьяс серти найӧ весиг турун пуктан удж заводитлӧмаӧсь.

Медводдзаысь мари йӧзкостса гаж нуӧдӧм йылысь сёрнисӧ панӧмаӧсь став Россияса мари съезд дырйи 1917 воын Бирск карын. «Пеледыш пайрем» медводз заводитӧмаӧсь нуӧдны Сернурскӧй кантон грездьясын 1920-ӧд вося май 27-29 луньясӧ. Гажсӧ пасъян лунӧн бӧрйӧма «Семьк» йӧзкостса праздниклӧн медводдза лунсӧ. 1930-ӧд вояс заводичигӧн «Пеледыш пайрем» дугдылӧмаӧсь пасйыны. Вылысь сийӧ чужӧма сӧмын 1965 воын. Мари войтырлы тайӧ гажыс - медшӧр гаж.



Менам чужан сиктöй - тайö Джеджим грезд. Сийö абу ёна ыджыд и абу ёна на важ. Сылы кумсё сизим арös на и эм. Но тайö зэв гажа да мича грезд. И ме кöсья сылы отсавны сідз, кыдзи верма. Öд Джеджим - тайö медмича да медрадейтана менам ин.

Чужан сиктöй - Джеджим грездöй

А мед миян грездным век вöлі сöстөм да пельк, ми, джеджимса олысьяс, быдтулыс петам уличö, медым пелькöдны да весавны муса Джеджимнымöс став лöп-ёгсьыс. А та бöрын ми ставным водзмöстчам да ышöдам мукöдсö, медым некод нинöм эз шыблав уличö да видзис грезднымöс сöстөма.

Зэв ёна отсалö Джеджимлы водзмöстчыны да паськыда нимавны миян нималана гижысь Виктор Егорович Напалков. Сийö аслас гижöдьяснас нимöдö оз сöмын миянлысь грезднымöс, но и татчöс олысьяссö, сиктса йöзлысь оласногсö да помтöм-дортöм мича вöр-васö.

Со неважөн на Джеджим грездын кыпöдисны выль музей, и татчö кутисны воывлыны уна йöз экскурсияөн, весиг ачыс Коми Республикаса Юралысь Вячеслав Гайзер миян выль музейö воліс.

А отсаліс музейсö лэптыны Виктор Егорович Напалков да сылөн муса гöтырыс - Наталья Васильевна. Наталья Васильевна жö öні көсий музей бокас вöчны ас вöчөм ичөтик ты. Панассö талы пуктисны нин. Тайö тыас көсийöны рöдмöдны чери. И миян грездным лоас нöшта на мичаджык да аслыспöлсджык, öд татшöмторйис некодөн на абу. А сідзкö, и аския луныс грезднымлөн эм на.

Öд тайö музей-шöринсö сы вылö и кыпöдисны,



медым сэтчö воывлісны унджык йöз да тöдмасысны коми йöзлөн аслыспöлöслуннас.

Та кындзи ыджыд пай пуктисны Джеджим грездса олысьяслысь олöмсö бурмöдöм могысь - кыпöдисны ыджыд, выль, мича, кирпичысь вöчөм вузасянін. Öні оз нин ков лэччывны Кулöмдінö ньöбасьны, ставсö, мый сöмын көсьян, вайöны ныр улöдзыд. Мый, дерт жö, ёна кокньöдö миянлысь олөнымöс.

Колян во грездын кыпöдисны ёнмöдчанін. Сийöс кыпöдны отсалісны ставныс, весиг ме отсаси. Татөн позьö ворсны волейболөн, стритболөн, футболөн. Эм и ки песлаланін.

Со кутшöм мича миян Джеджим грездным! И ми пуктам ыджыд пай, медым нöшта ёнджыка сийöс нимöдны. А öд ми асьным асланым киясөн вермам отсавны ас чужан грездлы. Колö сöмын сöстөммöдны керка дорнымöс, улич вывнымöс. А та могысь колö быдтыны мича, уна рöма дзоридзьяс, а туй бокьясö пуктыны мича пуяс. И бура видзöдны, медым некод эз кут шыблавны быдлаö лöп-ёгсö. И сэки миян грездным нюммунас, и быдöнлы лöö окота выльысь и выльысь воыны миян грездö да отсавны сийöс сöстөммöдны да паськöдны.

Анастасия НАПАЛКОВА,
Кулöмдін районьыс
Шöръяг шöр школаса
8 класс помалысь.



Менö шуöны Андрей Михайлов. Кöсья гижны скöт видзöм йылысь.

Мöскыд - семья вердысь

Медшöр видзанторйöн семья-лөн лоö мöс, öд сийö сетö и йöв, и нöк, и рысь, и вый, и яй. Став мöскыслөн эм ним: Калюш-мам, Сюрук-мам, Сьöдпель, Гөрäпель, Лысань, Серед, Сьöдук и с.в. Мам кывйöн величайтöны, дерт жö, сы вöсна, мый мöсьяс, кыдзи и ныв-бабаяс, ичöt куканьöс кынöмас новлöдлöны öкмыс тöлысь чöж.


Кöзьяйка некор оз сорав ас-сыс радейтана сюруксö мöд мöскöд, весиг тöдö мöс-мамöс баксöм серти. Мöсьясыд ёна радейтöны ветлыны йирсыны то нюр бокö, то ыли видзьясö. Кöзьяйка мöслөн голяс öшöдö жиннян, мед ылысянь кывны сийöс.

А олöма йöз шуöны: арнас кö пö сюрö мöслы узыны вöрын либö йирсянйын, сэсся сийö гортад корсьтöгыд оз нин лок, дыр ков-мас корсьны.

Мöскöс кöзьяйка лэдзö йирсыны, кор бадьлөн быдмас да ве-жöдас йылыс, а арнас Здви-женньö крам празник бöрын оз нин лэдзлы картаысь.

Кöзьяйка век ыджöдлö-величайтö ассыс мöссö кага-мамөн, вердысьөн-мамөн, матушкаөн. Мöскыд - збылысь ыджыд семья вердысь.

Ми дыр жö олим мöс-мамкöд. Сийöс шуисны Апрельöн. Миян



семьяын куим челядь, бать-мам да ыджыд мам. Апрель вöли збыль вердысьөн. Ми вöчам вöли рысь, нöк, шомйöв. Ыджыд мам тшöкыда пöжавлö блин да мукöд пöжас. Ми вöли пуктам турун видзьяс вылын, кодьяслөн эм асланыс ним: Дяк, Емель, Типö, Пиля Вась.

Артельнад вöли кык-куим ве-жонөн и пуктысям, мед тövбыд тырмас вердны Апрельöс да сы-лысь куканьöс.

Андрей МИХАЙЛОВ,
Кöрткерöс районьсь
Одыбса школаын
5-öг класс помалысь.

Геннагий ПОПОВ

Видз вылын

Гажа меным видз вылын:
Мича дзоридз öкта,
Батьлы, мамлы отсая,
Нимкодьöйла йöкта.

Чикышьяскöд паньяся,
Чöскыд сэтöр вота.
Бипур дорын паняся,
Юква тасьтi ректа.

Пыжсянь пöттöдз вуграся,
Ёкыш, кельчи кыя.
Дзизгысь номкöд тышкася -
Вир юысьöс виа!

Бура косьмöм туруныс
Чöскыд дукөн öвтö...
Мамкöд юрьяс ваялам,
Батьö зорöд чöвтö.



Туйвывса БЛОКНОТЫСЬ

Йошкар-Олао форум выло воысь финн-йöгра журналистъяслы нöшта мойвиис тöдмасьны карыслөн алыспöлöс архитектураөн, видзöдлыны уна сикас памятник выло, мунны Патриаршей площадь выетi, сэтчöс уличаяс кузя. Карыс зэв ёна вежсьöма бөръя воясö, быттьö кутишöмкö европейскöй карён лöма.

Йошкин Кот олö Йошкар-Олаын

Йошкар-Ола - Марий Эл республикалөн юркар. Карыс артмöма 1584 воын да медводз шусьöма Кокшага ю вылын Царев карён. Но нимсö некымынысь вежлöма - Царевококшайск, Краснококшайск, а 1928 восянь кутöма шусыны Йошкар-Олаөн. Мари кывсянь кö нимсö вуджöдны - лоö Гёрд кар (Красный город). 1696 воын вöлöма ыджыд пöжар, сотчöма зэв уна документ. Та понда история боксянь карыслөн олöм йылысь унатор стöча оз вермыны висьтавны.

Öнi Йошкар-Олаын олö матö 249 сюрс гöгөр морт. Сылөн ыждайс 101,8 квадратнöй километра.

Бөръя нель воён карыс ёна мичмöма. Туристъяслөн эм позянлун мунны С.Г.Чавайн нима бульвартi, пыравны художественнöй галереяö, аканьяслөн республикса театрö да Марий Элса национальнöй музейö, тöдмасьны памятникъясөн, шензыны вичкояслөн мичлунöн. Карыслөн уна шензöдана-торийөн нимкодясьöны сэтчöс

олысьяс, мукöд регион-странаысь воём гöсьтъяс.

Синмад шыбитчö 2009 воын востöм «Царевококшайский Кремль». Уна сё во чöж тани вöлöма административнöй да вузасян ин. «Царевококшайский Кремль» - Россияын медся том кремль.


Брюгге набережнöйлөн мичлунис нэм кежлад кольö сёлöмад. Сылысь архитектурасö босьтöма



Бельгияса Брюгге карсянь. Брюгге - Европаса медся мича ин лыдын. А Патриаршей площадь вылын кöть лунтыр ов - сэтшöм мича тани!

Йошкар-Олао кö локтин, быть колö аддзыны «Двенадцать апостолов» памятник. Композицияысь петкөдлö евангелиеысь сюжет. Водзын осёл вылын Иисус Кростос, а сы бöрын мунöны сылөн апостол-велöдчысьяс. Апостольяслөн ки-кокыс вöрöны, быттьö ловьяöсь. Найö петöны öти öдзöссянь да пырöны мöд öдзöсö 8 минут чöж. Скульптураяслөн ыждайс - 1,5 метра, вöчöма бронзаысь. Налөн петигөн юргö «Да молчит всяка плоть человека» сьылöм. «Двенадцать апостолов» позьö аддзыны быд куим час.

Öта-мöдсö радейтъяслы быть колö матыстчывлыны Пётр да Феврония памятник-фонтан дорö. История дорö кö шыöдчыны, Пётр князь веськөдлöма Муромён 18 нэмын, а гöтыр выло босьтöма гöль нылöс, кодi отсалöма Пётрöс мынтöдчыны сьöкыд висьöмысь. Арлыд серти торъялöмыс абу кажитчöма бояралы, но Пётр абу энöвтöма нылöс, öткажитчöма власьтысь. Кутшöм-



кө кад мысти Пётр да Феврония босьгчөмаось юрнуодны карнас. Кулөмаось найö öти лунö, июль 8 лунö, весиг гуалөмаось найös öтлабын.

Быдöнлы тöдса «Йошкин Кот» скульптура овмөдчöма Йошкар-Олаын. Бдждьд кань пукалө скамейка вылын. Студентгьяс малыштöны сылысь нырсö, медым мойвиас велөдчöмын.

Йошкар-Олаын эм Сомбатхей ин, а Венгрияса Сомбатхей карын эм Йошкар-Ола ин. Со ташöм каргьяс костын ёртасöм.

Аслыспөлос часи вöчöма национальной художественной галереялөн башня вылын. Часыс петкөдлө стöч кад, а сълөн курантгьяскöд öттшöтш часыслөн шуйга вылыс пельössыс петö Богородича «Троеручница». Сийö лэччö часыслөн шуйга улi юкөнö, көни петкөдлөма Афонской монастырьсысь вөрöта. Вөрöтаысь петö ослик да ньöжйöника нуö мыш вылас «Троеручница» öбраз композициялөн веськыдладорö, көни серпасалöма Успение храмлысь вөрöта.



Кар йылысь пасйöны:


- Йошкар-Ола - Россияын öти кар, коддөн нимыс заводитчö «Й» шыпассянь;

- Тани эм Фёдор Иоанновичлы памятник - Россияын сэсся некүтшöм карын абу;

- Йошкар-Ола пырö Россияса медбур 20 кар лыдö «Город России. Национальный выбор» интернет-проект серти.

Медым тырвийö гөгöрвоны Йошкар-Ола карлысь оласногсö, мичлунсö, колö ас синмөн ставсö аддзвыны. Тани йитчöма тшöтш и европейскöй культура - Амстердам, Венеция, Флоренция, Бельгияса Брюгге.

Екатерина МИКУШЕВА



Гожомтö виччысян-виччысян, а воас да, жарсьыс мукöддырйи муртса он пöд, он тöд, кытчö пышйыны. Жар поводдяö бурджык овны, дерт, ю, ты дорын. Но öд и гожöмын ми тшöкыда сідзжö велöдчам, уджалам, сдайтaм экзамен. Көть шулöмаось, «жарыд лытö оз чег», а видзчысьыштнытö колö жö.

Тожомтö виччысян-виччысян...

Со некымын вöзйöм вывтi жар поводдя дырйи:

Юöй ва да сёйöй фрукты - наысь вир-
яда содö минеральной сов да витаминъ-
яс. Ваыс мед эз вöв вывтi кöдзыд - ан-
гинаöн висьмыны тайö кадö зэв кокни,
сы вöсна мый иммунитетыс мортыслөн
жар дырйи ёна слабмö.



Аскöдныд эн новлöддöй
сьöкыдторьяс, сьöлöмыдды
нин сідз сьöкыд.

Быть ветлöддöй чышъянөн,
шляпаөн, зонтикөн - тайö видзас
сідз шусяна «тепловой ударысь».

Эм кö позяндун - мунöй ку-
пайтчыны, ю дорад пыр нин
ыркыдджык.

Жар поводдяö этшаджык
ветлöй уличтi.



Дыр шондi водзын эн
сулалöй. Зильöй веськав-
ны вуджөр улö.

Пасьтасыны колö югыд прöст пась-
кöмö, мед некытi эз зэлöд, ремень-гал-
стукасыны эн зильöй. Ва паськöм оз
мезды жарсьыд - мöдарö, вочасөн лö
сьöкыдджык. А кöмыд мед эськö
восьсаджык вöлi да ичöтджык каблу-
ка. И эн вунöдöй шляпа либö бандана
йылысь. Торйөн нин сьöд юрсия йöзлы
колö тупкыны юрсö шондiсьыс.



«Видзöматö пö Енмыс видзö», шулö-
маось. Видзöй асьнытö, и мед гожöмыс
ваяс сöмын бурсö да гажасö.



ТӨД ВЫЛӨ

Коми Республикаын Россияса МЧС-лөн медшөр управление юөртö вöзиймъяс, кыдзи кутны астьö гым-чард дырйи.

Визчысь гым-чаргысь!

Медшöрыс - колö дзик пыр кусöдны сотöвöй телефон да пуктыны сийöс бокö. Гымалигөн сёрнитны телефонön оз позь!

Гымалигөн кө пукалан гортын, оз ков матыстчыны би провод да розетка дорö, весиг антенна оз ков вөрöдны. Колö кусöдны став электроприборсö.

Быдөн тöдö, мый гым-чардысь оз позь дзевсыны пу улö, мöдарö - колö мунны-вешыны на дорысь 30-40 метр ылнаö.

Кар-сикт шöрын колö дзевсны гымалöмысь лавкаясö, унджыкыслөн налөн эм сідз шусяна промоотвод. А со автобус виччысянінын сулавны оз позь - вермас и сэтчö гымнöлыд веськавны.

Суис кө гымалöм восьсаинын - оз ков котöртны, а лöня восьлавны кутшöмкö увсöдинö.

Вадорын кө гымалö - некор оз ков дзевсыны берегвывса бадьяс пöвстö, мöдарö - колö кыз позьö ылöджык мунны берег вывсысь.

Машинаын позьö дзевсыны гым-чардысь, сöмын колö сувтны, кусöдны радио, пöдавны öшиньяс. А со велосипед да мотоцикл вылысь колö нин чеччыны.

Абу кө некутшöм дзевсянін - колö пуксыштны кутшöмкö увтасинö, гуранö, оз ков водны, сы вöсна мый муыд тшöтш нуöдö токсö.



«Коми йöзöдчан керка»
Коми Республикаса
автономной учрежденяе.

Веськöдлысьлысь
удж вöчысь
Е.В.ПЛЕТЦЕР
Гл.редактор
Г.В.МАКАРОВА

Газет панысь:
Печать да юөр сетан Коми
Республикаса агентство.
Регистриуйтöма
2007 вося ноябрь 28 лунö
йöзлы юөр сетöм да
культураса озырлун видзöм
кузя оланпаяс
збыльмöдöм бöрся
видзöдысь федеральной
службалөн Беломорской
управлениеын.

Регистриуйтан пас:
ПИ №ФС 3-0686.
Социальной тöдчанлуна
гижöдьясö йöзöдöма «Коми
йöзöдчан керка» автономной
учреждениелы печать да юөр
сетан КР-са агентствöөн
вичмöдöм сьöм вылö.

Редакциялөн адрес:

167982, Сыктывкар,
К.Маркс улича,
229-öд керка,
401-402 кабинетъяс.
Тел. 24-12-22, 24-36-49.
E-mail: Yologa@mail.ru

Редакцияын
уджалысьлысь:
том йöзлөн мытшöдъяс
юкөнөн веськöдлысь –
Надежда Пунегова;

письмö юкөнөн
веськöдлысь –
Екатерина Микушева.

Медводдза лист бокас
снимокыс
Екатерина
Микушевалөн.

Авторъяслөн мөвпяс оз
пыр лöсявны редакциялөн
видзöдласкөд.

Тираж – 568.
Гижöдчан индекс – 52099.
«Йöлöга» газет петö
1991-öд восянь
вежоннас öтчид, комиөн.

Печатьö кырымалан кад:
график серти – июнь
тöлысьлөн 25-öд лунö
16 часын; кырымалöма
печатьö 16 часын.
Газет печатайтöма
«Коми республиканской
типография» ООО-ын дас
оригинал-макетъясысь.
167610, Сыктывкар,
В.Савин улича, 81
Заказ №

Жар гожомнад горш косьмомысь отсалас чөскыд лимонад да сок. Дасьтыны найос абу сьёкыд. Татшом юанторто торйон нин радейтоны челядь.



Дашук
ВЕЛОДО

Чөскыд юантор



Вөрса озйысь лимонад

Колө: 1 стөкан лимон сок, стөкан джын сахарысь сироп, 450 г вөрса оз, 1 литра газированной ва, мята корьяс, мич вылө - некымын тусь вөрса оз, йитор.

Сахарысь сироп вылө: стөкан джын ва да сахар.

Сироп вылө отлаодны ва да сахар. Гудравны, кытчөдз сахарыс оз сыв. Блендерон нырны вөрса оз да стөкан джын сахарной сироп.

Дозйын гудравны лимон сок, озйысь пюре, стөкан джын сахарной сироп да газированной ва.

Содтыны йитор, мичмодны мята корйон да оз тусьясон. Вөрса озйысь лимонад дась!



Мятаысь лимонад

Колө: 2 стөкан мята, 2 стөкан ва, 1 стөкан сахар, 3 лимонаысь кыш да йитор.

Неыджыд көструльö кисьтны ва, содтыны сахар да лимон кыш. Видзны би вылын, кытчөдз сахарыс оз сыв. Вештыны би вылысь, содтыны мята да сулөдны вевтгөмөн час кымын. Сиропсö сөдзөдны пож пыр да кисьтны лимонадсö кувшинö. Вайны пызан вылө йитор содтөмөн. Мятаысь лимонад дась!



Виноградысь сок

Колө: 1 апельсин джынлөн кышыс, öти ичөт паньлөн нельöд пайыс кардамон, 4 гвоздика, 1,5 л виноград сок, стөканлөн нельöд пайыс ма, корица бедь, 2 стөкан газированной ва.

Апельсин кышсö, кардомон тусьяс да гвоздика пуктыны неыджыд марляторйö да гөрдазавны.

Кисьтны виноград соксö да масö ыджыд көструльö, пуктыны шөркодь би вылө. Пузяс да, вештыны би вылысь. Содтыны специа гөрөдсö, корица бедьсö сок пиö, вевтгыны да көдзөдны. Кыскыны гөрөдсö да корица бедьсö. Пуктыны соксö холодильникö. Пызан вылө вайтөдз содтыны газированной ва.



Нянь-сов!